



PATNUBAY SA MISA

23 Nobyembre 2025

Dakilang Kapistahan ng Pagkahari ng Panginoong Hesukristo sa Sanlibutan

Taon K

Si Hesus, Hari ng Mahabaging Pagmamahal

Ngayon ang huling Linggo ng taong pansamba. Marapat lang na sa araw na ito, ipahayag natin si Hesukristo di lamang bilang personal nating Panginoon at Hari, kundi “Hari ng Sanlibutan” din. Siya’y Haring isinilang pagkat siya ang Anak ng Diyos Ama na pinagmumulan ng lahat ng kapangyarihan ng mga hari. Siya rin ay Hari sa pagwawagi, pagkat nakapangyari siya sa kasalanan at kamatayan sa pamamagitan ng kanyang muling pagkabuhay. Sa pagpapahayag ng ating mga tinig at pamumuhay, marapat din siyang itampok na tunay nating Tagapagligtas at Hari.

Ngayong Dakilang Kapistahan ni Kristong Hari, pinasasalamatan din natin ang Panginoon sa lahat ng pagpapalang ipinagkaloob niya sa atin sa taong pansambang malapit nang matapos. Partikular natin siyang pinasasalamatan sa kanyang napakaraming grasyang espirituwal na ibinigay sa atin. Nawa ang Eukaristiya natin ngayon ay maging awit ng pagluluwalhati at pasasalamat kay Hesus, na Hari ng ating mga puso, at muling pagpapatibay ng ating katapatan sa kanya.



PASIMULA



Pambungad

(Ipahayag lamang kung walang awiting nakahanda.)

Ang Korderong inialay ay marapat paghandugan ng kadakilaa’t dangal, pagkilala’t pagpupugay, siya’y Haring walang hanggan.
(Pah 5, 12; 1.6)

Pagbati

P –Pagmamahal, luwalhati, at papuri kay Hesukristong Hari ng Sanlibutan! Ang kanyang biyaya at kapayapaan ay sumainyong lahat.
B –At sumaiyo rin.

Pagsisisi

P –Habang naghahanda para sa pag-aalay ng Eukaristiyang ito sa karangalan ni Kristong ating Hari, manahimik tayo sandali upang alamin kung gaano tayo naging tapat sa kanya. (Tumigil sandali.)

P –Para sa mga pagkakataong sa salita lamang namin ipinahayag ang aming pagmamahal sa iyo, Panginoon, kaawaan mo kami.

B –Panginoon, kaawaan mo kami.

P –Para sa mga pagkakataong tinalikdan ka namin habang ang sinunod nami’y mga sariling kagustuhan, Kristo, kaawaan mo kami.

B –Kristo, kaawaan mo kami.

P –Para sa mga pagkakataong nagkulang kami sa pagmamahal, paggalang, at pagtulong sa iyo sa aming kapwa, Panginoon, kaawaan mo kami.

B –Panginoon, kaawaan mo kami.

P –Kaawaan tayo ng makapangyarihang Diyos, patawarin tayo sa ating mga kasalanan, at patnubayan tayo sa buhay na walang hanggan.

B –Amen.

Papuri

B –Papuri sa Diyos sa kaitaasan

at sa lupa’y kapayapaan sa mga taong kinalulugdan niya. Pinupuri ka namin, dinarangal ka namin, sinasamba ka namin, ipinagbubunyi ka namin, pinasasalamatan ka namin dahil sa dakila mong angking kapurihan. Panginoong Diyos, Hari ng langit, Diyos Amang makapangyarihan sa lahat.

Panginoong Hesukristo, Bugtong na Anak, Panginoong Diyos, Kordero ng Diyos, Anak ng Ama. Ikaw na nag-aalis ng mga kasalanan ng sanlibutan, maawa ka sa amin. Ikaw na nag-aalis ng mga kasalanan ng sanlibutan, tanggapin mo ang aming kahilingan. Ikaw na naluluklok sa kanan ng Ama, maawa ka sa amin. Sapagkat ikaw lamang ang banal, ikaw lamang ang Panginoon, ikaw lamang, O Hesukristo, ang Kataas-taasan, kasama ng Espiritu Santo sa kadakilaan ng Diyos Ama. Amen.

Panalanging Pambungad

P –Ama naming makapangyarihan, sa iyong Anak na pinakamamahahal at Hari ng sanlibutan, niloob mong pag-isahin ang tanan. Idulot mong ang tanang kinapal na pinalaya sa kaalipinan ay makapaglingkod sa iyong kadakilaan at makapagpuri sa iyo nang walang humpay sa pamamagitan ni Hesus-kristo kasama ng Espiritu Santo magpasawalang hanggan.
B –Amen.

PAGPAPAHAYAG NG SALITA NG DIYOS



Unang Pagbasa 2 Sam 5, 1-3
Ibinabadya ng pagpapahayag kay David bilang “Hari ng Israel” ang pagluluklok kay Hesus-kristo, na buhat sa angkan ni David, bilang “Hari ng Sanlibutan.”

L –Pagbasa mula sa Ikalawang Aklat ni Propeta Samuel

Noong mga araw na iyon, nagkaisa ang lahat ng angkan ng Israel na pumunta sa Hebron upang makipagkita kay David. Sinabi nila, “Kami’y laman ng iyong laman at dugo ng iyong dugo. Nang si Saul ang hari namin, nanguna ka sa mga kawal ng Israel sa pakikipagdigma. Ipinangako sa iyo ng Panginoon na gagawin ka niyang hari upang mamuno sa kanyang bayan.”

Lahat ng matatanda ng Israel ay nagpunta nga sa Hebron at doo’y nakipagkasundo sa kanya sa harapan ng Panginoon. Binuhusan nila ng langis si David at kinilalang hari sa Israel.

Ang Salita ng Diyos.

B –Salamat sa Diyos.

Salmong Tugunan

Sal 121, 1-2. 4-5

B –Masaya tayong papasok sa tahanan ng Poong D’yos.

R. M. Velez

* Ako ay nagalak, sa sabing ganito: “Sa bahay ng Poon ay pumasok tayo!” Sama-sama kami matapos sapitin, ang pintuang-lunsod nitong Jerusalem.
B.

* Dito umaahon ang lahat ng angkan, lipi ni Israel upang magsambahan, ang hangad, ang Poon ay pasalamatan, pagkat ito’y utos na dapat gampanan. Doon din naroon ang mga hukuman at trono ng haring hahatol sa tanan.
B.

Ikalawang Pagbasa Co 1, 12-20
Sa kanyang liham sa mga taga-Colosas, itinampok ni San Pablo para sa lahat ng henerasyong Kristiyano ang ganap na pananaig at kahigtan ng Anak ng Diyos, na Hari ng Sanlibutan.

L– Pagbasa mula sa Sulat ni San Pablo sa mga taga-Colosas

Mga kapatid, magpasalamat kayo sa Ama, sapagkat minarapat niyang ibilang kayo sa mga hinirang na magmamana ng kaharian ng kaliwanagan. Iniligtas niya tayo sa kapangyarihan ng kadiliman at inilipat sa kaharian ng kanyang minamahal na Anak. Sa pamamagitan ng Anak, tayo’y pinalaya at pinatawad sa ating mga kasalanan.

Si Kristo ay larawan ng Diyos na di-nakikita, at siyang may kapangyarihan sa lahat ng nilikha. Sapagkat ang lahat ng nasa langit at nasa lupa, nakikita man o hindi, pati ang mga naghahari at namamahala, mga namumuno at may kapangyarihang espirituwal ay pawang nilikha ng Diyos sa pamamagitan niya at para sa kanya. Siya’y una sa lahat, at sa kanya nasasalalay ang kaayusan ng lahat ng bagay. Siya ang ulo ng simbahan na kanyang katawan. Siya ang Una, ang panganay na Anak – ang unang nabuhay na muli upang siya ang maging pinakadakila sa lahat ng bagay. Ipinasiya ng Diyos na ang kanyang kalikasan ay manatili rin sa Anak, at inibig niyang ang sandaigdigan ay makipagkasundo sa kanya sa pamamagitan ng Anak. Sa pamamagitan ng pagkamatay

nito sa krus, nagkasundo nga ang Diyos at ang lahat ng nilikha sa langit at sa lupa.

Ang Salita ng Diyos.

B –Salamat sa Diyos.

Aleluya

Mc 11, 9.10

B –Aleluya! Aleluya!

Pagpalain dumarating sa ngalan ng Poon natin, paghahari’y kanyang angkin.
Aleluya! Aleluya!

Mabuting Balita Lu 23:35-43
Sa pagdurusa niya sa krus, pinatunayan ni Hesus na siya nga ang “Hari ng Langit at Lupa.” Ipinakita niya ang kanyang kapangyarihang panghari nang buksan niya ang kalangitan sa sangkatauhang sinagisag ng nagsising magnanakaw.

P – Sumainyo ang Panginoon.

B –At sumaiyo rin.

P –Ang Mabuting Balita ng Panginoon ayon kay San Lucas
B –Papuri sa iyo, Panginoon.

Noong panahong iyon, nilibak si Hesus ng mga pinuno ng bayan. Anila, “Iniligtas niya ang iba; iligtas naman niya ngayon ang kanyang sarili, kung siya nga ang Mesiyas, ang hinirang ng Diyos!” Nilibak din siya ng mga kawal, nilapitan at inalok ng maasim na alak. Sinabi nila, “Kung ikaw ang hari ng mga Judio, iligtas mo ang iyong sarili.” At nakasulat sa ulunan niya sa wikang Griego, Latin at Hebreo, “Ito ang Hari ng mga Judio.” Tinuya siya ng isa sa mga salaring nakabitin, at ang sabi, “Hindi ba ikaw ang Mesiyas? Iligtas mo ang iyong sarili, pati na kami!”

Ngunit pinagsabihan siya ng kanyang kasama, “Hindi ka ba natatakot sa Diyos? Ikaw ma’y pinarurusahang tulad niya! Matuwid lamang na tayo’y parusahan nang ganito dahil sa ating mga ginawa; ngunit ang taong ito’y walang ginawang masama.”

At sinabi niya, “Hesus, alalahanin mo ako kapag naghahari ka na.” Sumagot si Hesus, “Sinasabi ko sa iyo: ngayon di’y

isasama kita sa Paraiso.”

Ang Mabuting Balita ng Panginoon.

B—Pinupuri ka namin, Panginoong Hesukristo.

Homiliya

Sumasampalataya

B—Sumasampalataya ako sa Diyos Amang makapangyarihan sa lahat, na may gawa ng langit at lupa.

Hesukristo, iisang Anak ng Diyos, Panginoon nating lahat. Nagkawatang-tao siya lalang ng Espiritu Santo, ipinanganak ni Santa Mariang Birhen. Pinagpakasakit ni Poncio Pilato, ipinako sa krus, namatay, inilibing. Nanaog sa kinaroroonan ng mga yumao. Nang may ikatlong araw nabuhay na mag-uli. Umakyat sa langit. Naluluklok sa kanan ng Diyos Amang makapangyarihan sa lahat. Doon magmumulang paririto at huhukom sa nangabubuhay at nangamatay na tao.

Sumasampalataya naman ako sa Diyos Espiritu Santo, sa banal na Simbahang Katolika, sa kasamahan ng mga banal, sa kapatawaran ng mga kasalanan, sa pagkabuhay na muli ng nangamatay na tao at sa buhay na walang hanggan. Amen.

Panalangin ng Bayan

P—Natitipon bilang mag-anak ng Diyos ngayong Dakilang Kapistahan ni Kristong ating Hari at Hari ng Sanlibutan, tayo’y maghain ng ating mga kahilingan sa Panginoon para sa mga pangangailangan ng sangkatauhan at ng ating sari-sarili. Tugon natin ay:

B—Panginoon, pagharian Mo kami.

* Para sa Simbahan, ang Katanawan ni Kristo: nawa Siya’y maging tunay na kasangkapan ng makaharing paglilingkod ni Kristo sa lahat ng tao sa pagtataguyod ng kapayapaan, pakikipagtulungan, at katarungan. **B.**

* Para sa Santo Papa, sa mga obispo, at kaparian: nawa manatili silang tapat sa kanilang pang-

kong maglingkod nang buong kababaang-loob at katapatan ni Kristo sa mahihirap at mahihina. Manalangin tayo. **B.**

* Para sa mga nagsisikap upang maging buhay na katunayan ang pagiging hari ni Kristo: magtagumpay nawa sila sa kanilang pagsisikap na maghatid ng pagmamahal ni Hesus sa lahat ng kultura’t tahanan. Manalangin tayo. **B.**

* Para sa lahat ng nagpapahalaga at namumuhay nang labag sa mga pangaral ni Kristo: nawa, tulad ng nagsising magnanakaw, makilala nila ang kanilang pagkakasala at maging lubos na tapat kay Hesus, ang tunay nating Hari. Manalangin tayo. **B.**

P—Panginoon, ibinigay Mo sa amin si Hesus para maging aming Hari ng habag at pagmamahal. Pagindapatin Mo kami sa gayong kadakilang Hari at gawin Mo kaming mga sugo ng kanyang pagmamahal sa lahat. Isinasamo namin ito sa ngalan ni Hesus, na Iyong Anak na nabubuhay at naghahari magpakailanman. **B—Amen.**



P—Manalangin kayo . . .

B—Tanggapin nawa ng Panginoon itong paghahain sa iyong mga kamay sa kapurihan niya at karangalan, sa ating kapakinabangan at sa buong Sambayanan niyang banal.

Panalangin ukol sa mga Alay

P—Ama naming Lumikha, sa paghahain namin ng mga alay sa ikapagkakasundo ng sangkatauhan iniluluhog naming ang iyong Anak nawa’y magbigay ng mga kaloob na pagkakaisa at kapayapaan sa pamamagitan niya kasama ng Espiritu Santo magpasawalang hanggan. **B—Amen.**

Prepasyo

P—Sumainyo ang Panginoon.

B—At sumaiyo rin.

P—Itaas sa Diyos ang inyong puso at diwa.

B—Itinaas na namin sa Panginoon.

P—Pasalamatan natin ang Panginoon at ang Diyos.

B—Marapat na siya ay pasalamatan.

P—Ama naming makapangyarihan, tunay ngang marapat na ikaw ay aming pasalamatan.

Hinirang mong tagapaghain ng tanan ang iyong Anak na Panginoon ng sanlibutan. Pinalaloy mo sa kanya ang langis ng kasiyahan tanda ng paghirang mong pangmagpakailanman. Sa paghahaing ginampanan niya sa krus, siya ang dalisay na tagapagbuklod, siya ang gumanap sa aming pagkatubos, siya ang sumakop sa sansinukob. Ang kanyang paghaharing lagi sa lahat ay siyang lubusang naglalahad ng iyong kadakilaang matapat upang buhay mo’y sa lahat maigawad. Sa paghahari niya, lahat ay hinahatian sa iyong kagandahang-loob at kabanalan, sa iyong dangal at kapayapaan.

Kaya kaisa ng mga anghel na nagsisiawit ng papuri sa iyo nang walang humpay sa kalangitan, kami’y nagbubunyi sa iyong kadakilaan:

B—Santo, santo, santo Panginoong Diyos ng mga hukbo. Napupuno ang langit at lupa ng kadakilaan mo. Osana sa kaitaasan.

Pinagpala ang naparirito sa ngalan ng Panginoon. Osana sa kaitaasan.

Pagbubunyi

B—Aming ipinahahayag na namatay ang ‘yong Anak, nabuhay bilang Mesiyas at magbabalik sa wakas para mahayag sa lahat.



B—Ama namin . . .

P—Hinihiling namin . . .

B—Sapagkat iyo ang kaharian at ang kapangyarihan at ang kapurihan magpakailanman. Amen.

Paanyaya sa Kapayapaan

Paghahati-hati sa Tinapay

B—Kordero ng Diyos na nag-aalis ng mga kasalanan ng sanlibutan, maawa ka sa amin. (2x)

Kordero ng Diyos na nag-aalis ng mga kasalanan ng sanlibutan, ipagkaloob mo sa amin ang kapayapaan.

Paanyaya sa Pakikinabang

P–Ito ang Kordero ng Diyos na nag-aalis ng mga kasalanan ng sanlibutan. Mapalad ang mga inaanyayahan sa kanyang piging.
B–Panginoon, hindi ako karapat-dapat na magpatuloy sa iyo ngunit sa isang salita mo lamang ay gagaling na ako.

Antipona ng Pakikinabang

(Ipahahayag lamang kung walang awiting nakahanda.)

Maghahari kailanman ang Panginoon sa tanan. Pagpapala’y ibibigay ng Poon sa kanyang bayan upang tana’y matiwasay.
(*Sal 29, 10-11*)

Panalangin Pagkapakinabang

P–Ama naming mapagmahal,

kaming pinapakinabang mo sa pagkaing nagbibigay-buhay ay nagsusumamong kaisa niyang makapamuhay sa kaharian sa langit magpakailanman pakundangan sa karangalang sundin ang mga kautusan ng Haring si Kristo sa sanlibutan sa pamamagitan niya kasama ng Espiritu Santo magpasawalang hanggan.

B–Amen.



P–Sumainyo ang Panginoon.

B–At sumaiyo rin.

P–Magsiyuko kayo at ipanalangin ang pagpapala ng Diyos. (*Manahimik sandali.*)

Iligtas nawa kayo ni Kristong Hari ng Sanlibutan sa lahat ng

panganib at ipalaspas sa inyo ang kanyang mapagligtas na pagmamahal.

B–Amen.

P–Tibayan niya nawa ang inyong pananampalataya upang kayo’y maging matatapang na sugo ng kanyang Kaharian.

B–Amen.

P–Nawa gabayan niya kayo sa kanya at akayin kayo sa landas ng kawanggawa at kapayapaan.

B–Amen.

P–Pagpalain nawa kayo ng makapangyarihang Diyos: Ama, Anak, at Espiritu Santo.

B–Amen.

P–Humayo kayo sa kapayapaan ni Kristong ating Hari.

B–Salamat sa Diyos.

Si Hesus, ang Hari ng Langit at Lupa

• Jess P. Balon

Ang nakasulat na “Hari ng mga Judio” sa may ulunan ni Hesus sa krus ay inilaang isang *pagkutya* sa kanya at *insulto* sa buong bansang Judio – ang matinding paghihiganti ni Pilato sa mga pinunong relihiyoso na hindi niya napagbigyan sa kanilang mga kahilingan!

Gayunman, sa kabila ng maling layunin at pagpapakita, ang bansag na “hari” sa taong nagdurusa sa krus, ay tunay ngang angkop at narapat, pagkat si Kristo ay isa ngang tunay na hari. Isinilang siyang hari sa mula’t mula pa, ang bugtong na Anak ng walang hanggang Hari ng sanlibutan. Kung mayroon man sa lupang tunay na karapat-dapat sa gayong bansag sunod sa Diyos Ama, iyon ay ang Kanyang Anak na nagkatawang-tao’t nakilala sa ngalang “Hesus ng Nazaret.”

Ngunit di-tulad ng karamihan sa mga hari sa lupa, di hangad ni Hesus ang bansag na “hari.” Kailanma’y hindi niya ito hinangad; sa katunayan pa nga’y itinatago pa niya ang kanyang maharlikang karangalan nang magbuhay mahirap siya at naging masunurin sa mga nakatatanda sa kanya sa pamilya at mga pinunong relihiyoso. Tunay ngang walang ano mang palatandaan ng pagiging maharlika sa sabsaban sa Betlehem; sa paglilikas sa kanya sa Egipto; sa kanyang buhay sa Nazaret, kung saan siya nakilala ng lahat bilang “anak ng karpintero” (*Mt 13:55*) at “karpintero” (*Mc 6:3*). Sa panahon ng kanyang pangangaral, nang nais ng mga taong gawin siyang hari, umiwas lamang si Hesus. (*Sangguniin Jn 6:15*.) At nang tanungin siya ni Pilato tungkol sa kanyang pagkahari, paiwas ang sagot niya kung kaya hindi siya maparatangan ng pakikipagsabwatan

o paghihimagsik.

Bagamat sa buhay niya sa lupa tumanggi siyang matawag na hari, *tunay naman siyang gumamit ng kanyang kapangyarihang pangharinang* magapi niya si Satanas, ang malaking kalaban ng kanyang Paghahari. (*Sangguniin Mc 1:23-27 at 9:25-26*.) At nang malapit na siyang malagutan ng hininga, pinangkuan niyang isasama sa langit ang nagsisi-sing magnanakaw, ang bukod-tangi sa Kalbaryo na hayagang nagpamalas ng pananampalataya sa kanyang pagkahari. (*Sangguniin ang sipi ng Ebanghelyo ngayon*.)

Ang pagkahari ni Hesus ay di-tulad ng dito sa mundong ito, na sumasaklaw sa isa lamang bansa, may katapusan, at kailangang ipagtanggol ng mga hukbo. **Ang kanyang kaharian ay panlahat at walang hanggan.** Ang kapangyarihan nito ay kabahagi ng kapangyarihan ng Diyos, ngunit ang katapatan dito ay lubos na depende sa kalayaan ng bawat isa. Ang pagiging kabilang sa kaharian ni Kristo ay depende lamang sa pananampalataya at sa pagtupad sa kautusang pagmamahal. Tanging ang mga nagmamahal at nananalig sa kanya ang kabilang sa kanyang paghahari. Kaya nga, **ang luklukan ng kanyang paghahari ay ang puso ng sinumang nagmamahal at sumusunod sa kanya.**

Ang paghahari ni Kristo ay ganap na makikita sa katapusan ng mundo, sa bagong panahon kung kailan “lahat ay mapapasailalim ng Anak” at “ibibigay niya sa Diyos at Ama ang paghahari . . . at sa gayon, lubusang maghahari ang Diyos sa kalahat-lahatan” (*1 Cor 15:24-28*). Pagpapalain ang mga nagbunyi kay Kristo bilang kanilang hari sa buhay na ito.



**WORD AND LIFE
PUBLICATIONS**

Don Bosco Compound, A. Arnaiz Ave. cor. Chino Roces Ave., Makati, Metro Manila

Postal Address: P.O. Box 1820, MCPO, 1258 Makati, Metro Manila, Philippines

Tel. Nos. 8894-5401; 8475-8945 • Website: www.wordandlife.org

• E-mail: wordandlifepublications@gmail.com • FB: Word And Life Publications

• Editorial Team: Fr. R. De Guzman, V. David, R. Molmog, D. Daguió

• Illustrations: A. Sarmiento, B. Cleofe • Circulation: R. Saldua